

■ UDIN

Il rûl de lenghis di minorance

Sabide ai 31 di Otubar, aes 9 e mieze di matine, te sale cunvignis de Universitât dal Friûl in palaç Antonini a Udin, si davuelzarà la cunvigne «Il rûl des lenghis di minorance te Euroregion». La iniziative e je stade organizade dal Comun di Udin, adun cu la Agjenzie regjonâl pe lenghe furlane e il Centri internazionâl sul plurilinguism de Universitât dal Friûl, e e sarà la ocasion par fevelâ di minorancis intune dimension europeane. Lis relazions de zornade a tocjaran doi aspjets: di une bande, la situazion atuâl de tutele de minorance, di chê altre, la prospetive di svilup europeane. La cunvigne si vierzarà cui salûts dal sindic di Udin, Furio Honsell, e dal president de Arlef, Lorenzo Zanon, po la assessore regjonâl Federica Seganti, delegade ai rapuarts internazionâi e comunitaris, e spiegarà il progjet de Euroregion tal detai. Si passarà ae relazion di Fabiana Fusco dal Cip che e descrivarà il panorame linguistic de Euroregion, un teritori che al va dal Venit ae Cravuzie passant pe Carinzie. Guglielmo Cevolin de Universitât dal Friûl al presenterà la situazion des minorancis di un pont di viste juridic. Subit dopo a vignaran lis relazions plui technichis dai rapresentants des comunitâts di minorance. Marco Stolfo al fevelarà de situazion des minorancis te regjon, cun particolâr atenzion a chê furlane. Maurizio Tremul, president de Union Italiane, e Vito Paoletič de comunitât dai talians di Pola a presentaran la situazion de minorance taliane in Slovenie e Cravuzie. De minorance slovene in regjon al fevelarà Milan Bufon, president dal Istitût Sloven di ricercje (Slori) di Triest, invezit par illustrâ la situazion carinziane a intervignaran Štefka Vavti, ricercjadore dal Slowenisches Wissenschaftliches Institut, e Marjan Sturm, president dal Zentralverbandes Slowenischer Organisationen. Elsa Zardini, presidente de Union Generela di Ladins dles Dolomites, e presenterà la minorance ladine e Velia Plozner, componente de Comission consultive pe minorance gjermanofone, e fevelarà des comunitâts gjermanofonis de regjon, cun riferiment ancje ae gnove propueste di leç regjonâl pe tutele des comunitâts di lenghe todescje. Tal dopomisdì, te sale Ajace dal Comun di Udin, a saran organizâts diviers apontaments sul teme dal plurilinguism e de multiculturalitât: un recital musicâl e un leterari, videoproiezioni, une esposizion di materiâi produsûts tes lenghis de regjon e un dibatiment a plui vòs sul teme dal multilinguism e de educazion plurilengâl.